







DECLARATION

FAICTE PAR MONSIEVR
LE PRINCE DE CONDE',
à tous les Ordres & Compagnies de la
France, des causes qui le meuent à
demander la Reformation de l'Estat,
& changement des mauuais Con-
seillers.

M. DC. XV.

Case

F

39

326

1615 codf

DECLARATION

THE NEW YORK
LIBRARY

MAISTRE PAR MONSIEUR
LE PARLEMENT DE PARIS
Monsieur le Procureur General de la
Justice, des causes qui le concernent
et mander la Religion de l'Eglise
et conservant des manieres con-
venables

M. D. C. X. V.

DECLARATION FAICTE
*par Monsieur le Prince de Condé, à tous les
Ordres & Compagnies de la France, des
causes qui le meuuent à demander la Refor-
mation de l'Estat, & changement des mau-
uais Conseillers.*

MESSIEURS, Chacun sçait comme par plusieurs fois i'ay faict entendre au Roy & à la Royné sa Mere les causes des desordres qui trauaillent ce Royaume, & supplié leurs Majestez y apporter par leurs prudences les remedes necessaires, crainte que la continuation ne le porte à sa ruine? Ce fut le sujet des tres-humbles Remonstrances que ie fis l'an passé à la Royné Regente par l'aduis des Princes, Officiers de la Couronne, & bon nombre de Seigneurs, Gentilshommes & autres dont i'estois assisté, laquelle dès lors eust faict sentir à la France les effects de son bon naturel, si sa route bonté n'eust esté preuenüe par l'artifice des mauuais Conseillers que les ennemis du repos de la France entretiennent pres sa personne; Lesquels au lieu de luy faire recevoir mes aduis comme Allimens viles à la restauration de cet Estat, les luy presenterent si corrompus de leur venin qu'ils en tirerent le remede propre à l'entretenement de la maladie, pour dans ce mal cacher leurs mauuais desseins, & faire en sorte que la clameur & plainte des peuples ne vinst aux oreilles du Roy & de la

Royne, & qu'elle ne refueillast leurs compas-
sions au soulagement du pauvre peuple, & à la
iuste vengeance des oppressions qu'ils exercent.
Cette preoccupation des esprits de leurs Maje-
stez rendit dès lors ces malignes ames si auda-
cieuses qu'ils oserent calomnier non seulement
mes iustes intentions, mais celles de ceux qui
m'assistoient, disans que la Reformation qu'on
demandoit n'estoit qu'un pretexte pour oster à
la Majesté de la Royne lors Regente le gouver-
nement de l'Estat? Que les voix & plaintes que
l'on disoit publiques n'estoient que clameurs de
quelques mutinez & rebelles, amateurs de nou-
veautez, desquels la punition seroit vne victime
tres-agreable; Enquoy la trop grande credulité
de la Royne se laissa facilement emporter, & fa-
vorisant innocemment leurs desseins, ferma l'o-
reille à mes Remonstrances, & aux vœux de tous
les bons François. Car prenant le faux pour le
vray, Au lieu de Iustice que ie requerois, on parla
de m'opprimer par les Armes; On assembla des
troupes en Corps d'Armée, on fit des levées de
Suisses & de nouveaux Regimens, on tira de la
Bastille l'argent que le feu Roy y auoit mis pour
servir de terreur aux Estrangers, à fin de l'em-
ployer contre son propre sang & ses plus fideles
seruiteurs, non pour autre coulpe que pour ce
qu'ils auoient osé ouurir la bouche pour parler
des miseres publiques causées par les mauuais
Conseillers de l'Estat: Toutesfois telles calom-
nies proposées contre des personnes de telle
qualité, suppliantes, innocentes & desarmées,
ayant esté publiquement detestées par quelques
gens de bien qui se trouuerent pres de leurs Ma-

5

jestez l'execution de si pernicious Conseils fust
arrestée: Ce fut lors qu'on proposa vne Confe-
rence, laquelle fut commencée à Soissons, &
conclue à sainte Menchouft, par vne resolution
d'assembler les Estats Generaux pour remedier
aux playes de ce Royaume, Cette sainte resolu-
tion fit retirer tous ceux qui m'assistoient, espe-
rans qu'en cette assemblée se trouueroyent les
moyens pour remedier aux maux de cet Estat, &
le remettre en son ancienne dignité & splen-
deur, Mais ces remedes s'estans trouuez plus
propres à aigrir le mal que à se consolider on re-
cogneust aussi tost que la guarison n'en seroit
telle que l'on auoit esperé; Car dès l'entrée ceux
que l'ambition & l'auarice portoient à d'autres
desseins auxquels ils ne pouuoient paruenir que
par la confusion, craignans que les effects n'en
arrestassent le cours, ne cessèrent par toutes sor-
tes d'artifices à en troubler la conuocation, &
pour ce faire, fusciterent la mutinerie de Poi-
ctiers, où m'estant acheminé avec quelques do-
mestiques pour demander raison d'un outrage
faict à un des miens, ils practiquerent un nom-
bre d'habitans d'humeur seditieuse, lesquels en
pleine Paix la France exempte de tous troubles,
remplirent la ville de frayeur, comme si l'enne-
my Estranger eust esté à leurs portes. Dequoy
m'estant plaint à la Royne, ces mauuais Conseils
gagnerent aussi tost l'oreille de sa Majesté. & la
remplirent de calomnies & fausses impressions,
disans que i'auois voulu saisir la ville de Poi-
ctiers, chose ridicule, qu'un Prince desarmé sous
la foy publique d'un Traicté, accompagné seule-
ment de ses domestiques, ayt voulu s'emparer

d'une ville de telle importance au milieu du Royaume, luy qui armé ne l'a pas entrepris sur des places de plus libre accez, & beaucoup plus faciles à garder. Ce qu'ils firent, croyans assurément que ie voudrois poursuiure la raison de cette offense qu'eux-mêmes croyoient iuste, & que la reparation m'en estant déniée, cela me porteroit à quelque extrémité: & que par ce moyen ils romproient la conuocation des Estats, Toutes-fois poussé de l'affection naturelle que j'ay & auray tousiours à ma Patrie, & à l'obeissance que ie dois à mon Roy, j'ay quitté cette iniure pour la donner au public; poursuiuant tousiours leurs Majestez de faire la conuocation des Estats.

Ce que voyans ces mauuais Conseillers, & qu'ils ne pouuoient fuir vne si equitable demande, ils prindrent resolution de les faire assembler en la ville de Paris, lieu de leur bien-seance. Pour les faire reüssir en sorte que les plaintes des/suiets du Roy fussent supprimées, les entreprises contre l'Estat dissimulées, l'impunité des crimes favorisées, les desordres & la confusion establies, toutes sortes de larcins autorisez pour le passé, & prouignez pour l'aduenir, & le nom d'Estats à iamais odieux & abominable aux François, & pour en faciliter l'execution firent des menées dans toutes les Prouinces pour auoir des Deputez à leur deuotion, promettans aux plus intelligens des dons & gratifications, & menaçans les plus timides, comme si à bien faire on encouroit peine & coulpe, faisans mesme retracter l'esle-ction de plusieurs, disans faussement qu'ils n'estoient agreables à leurs Majestez. En quelques endroits ceux de leur faction se sont deputez

eux-mesmes : s'attribuans par la force l'honneur qu'ils ne pouuoient legitiment esperer, bref toute sorte de liberté y a esté entierement opprimée ; On ne s'est pas contenté de cela, on a enuoyé par les Prouinces des m^{res}. de ce que l'on vouloit estre mis dans les Cahiers, lesquels en beaucoup de lieux, voire quasi par tout ont esté adressez sans les communiquer aux Corps des villes & Communautéz, tant de la Noblesse que du peuple : De sorte que l'on peut dire avec verité, que cette assemblée n'auoit des Estats autre chose que le nom, le peuple en a crié & s'en plaint encores publiquement, mais ceux qui profitent de sa misere, & moissonnent ses calamitez, scauent que telles plaintes par le temps sont enseuelies dans l'oubly, & que l'accoustumance rendra toutes sortes de maux supportables.

Le tiers Estat qui estoit la plus saine partie de l'assemblée, auoit voulu confirmant son ancienne affection, pouruoir à la seureté de son Roy, par vn remede iugé conuenable par tous les gens de bien : mais ces mauuais Conseillers ont suscité des gens aussi desloyaux à leur Roy, & ingrats à leur Patrie qu'eux, lesquels ont fait de la vie des Roys le sujet d'une question problematique, & maniere de discorde dans ceste grande assemblée, sur laquelle ils ont fait donner vn Arrest au Conseil du Roy, qui impose silence à tous les trois Ordres, laissant ceste question indecise, comme si la seureté de la vie des Roys estoit vne question scrupuleuse, ou vn affaire qui ne fust pas digne d'estre traictée, & pour fauoriser la negatiue de ces desloyaux on a estimé parmy le peuple des libelles qui assuiettissent les person-

nes, & les Estats des Roys, & premiers Souuerains à vne autre puissance, & leur vie à la fureur des assassins qui voudront les tenir pour Tirans selon l'opinion, ou le commandement qu'ils en pourront auoir: & qui pis est, ces liures s'impriment & se vendent publiquement, mais les responses qui s'y font par les bons François sont censurées, & les Autheurs, Libraires, & Imprimeurs emprisonnez & recherchez comme criminels de leze Majesté. D'auantage, ne se contentans d'auoir fomenté vn mal si dangereux contre la sacrée personne des Roys, ils ont fait rayer des Cayers des Estats, l'article qui portoit la recherche du detestable parricide commis en la personne du feu Roy de tres-heureuse memoire, dont la playe encores toute sanglante crie vengeance deuant la Iustice de Dieu contre les perfides Autheurs de sa mort.

On a veu le Mareschal d'Ancre que la faueur seule, non le merité, l'extraction, ny les seruices rendus à la France a introduit aux premieres charges, & aux plus importans gouuernemens de l'Estat contre les loix du Royaume entreprendre audacieusement à la face des Estats, de faire des assassinats contre la Noblesse, fauorisé avec telle impunité que les plaintes ont esté renuës pour crimes, & le sentiment d'une si iuste douleur estouffée par la faueur d'une puissance absolüe, & par les menaces d'une derniere volonté, Ce qui a depuis peu de iours donné l'audace à vn soldat Italien de la Citadelle d'Amiens, d'assassiner publiquement le Sieur de Prouuille Sergent Major de la ville, sansque iusques icy la punition en ait esté faite, & en mesme temps, des pour-

suiuites

suittes rigoureuses contre des Gentils-hommes François pour des causes legeres, & de petite consequence, pour s'estre ressentis de la perfidie & trahison domestique de quelques seruiteurs infideles, lesquelles neantmoins on a mis au plus haut degré d'offense, parce qu'ils affectionnoient mon seruice. On a bien fait pis, on a fait venir dans la ville capitale du Royaume des personnes detestables enuers Dieu, & les hommes: comme Iuifs, Magiciens, empoisonneurs, meurtriers, par le ministere desquels on a fait plusieurs entreprises contre ma lettre, celle de Monsieur de Longueville, & d'autres Princes & Seigneurs affectionnant le seruice du Roy, & le bien de son Estat: lesquels ont leur retraite & refuge au logis du Marechal d'Ancre, & à son occasion toute faueur en Court & entrée aux plus grandes maisons.

On a veu en mesme temps recenoir toutes sortes d'aduis & inuentions pour leuer deniers sur le peuple trente-cinq ou quarante Edicts scellez pour cet effect, mais les deniers non plus que ceux qui procederont de la nouuelle reuente des Greffes, & autres Domaines, que par le bon mesnage du feu Roy, s'en alloient dégager, ne sont pas destinez pour entrer aux coffres du Roy, ny pour pouruoir aux necessitez publiques, mais pour assouuir l'auarice insatiable du Marechal d'Ancre, qui est telle qu'il se verifera, que depuis la mort du feu Roy par diuers moyens, & par supposition de noms empruntez pour faciliter la verification des dons, il a tiré en deniers clairs plus de six millions de liures.

Aussi a-on veu les efforts qu'il a faits pour ar-

racher des mains de Monsieur de Longueville le gouvernement de Picardie, l'un des plus importants du Royaume, luy faisant proposer des recompenses excessives, & par un exemple hon-teux mettre à prix d'argent ce qui est donné pour récompense à la vertu & fidelité de ses predecesseurs, & ne l'ayant peu obtenir, on a veu depuis peu de iours la violence, que sous le nom du Roy il a fait faire dans Amiens pour s'y rendre le plus fort, à fin de faire redouter au Roy sa puissance, & le contraindre à supporter sa trame pour ne perdre vne place si importante, laquelle ordinairement par telles personnes qui n'ont aucune affection naturelle, ny interest à la conservation de l'Estat.

On voit encores tous les iours, à la honte de la France, cet estranger avec ses adherans estre la porte des honneurs & des charges publiques, disposer des Benefices, Offices, & Gouvernemens, distribuer les pensions, & estre arbitres & dispensateurs de toutes les graces, iusques à donner la vie ou la mort aux sujets du Roy, selon qu'il luy plaist en faire accorder ou refuser les remissions, & par ce moyen faire nombre de creatures, ce qu'ils pourront faire d'avantage lors que le droict annuel sera abolipour par telles voyes desrober au Roy pendant la foiblesse de son aage. l'affection de ses sujets, & luy faire porter l'enuie du ioug insupportable qu'ils ont mis sur son peuple : qui est le chemin des plus hautes entreprises, & un tesmoignage asseuré de la grandeur de leurs desseins.

Ces choses, & plusieurs autres entreprises avec hardiesse & attentées avec toute impuni-

ré ont fierement paru à la face des Estats, auxquels n'estant resté que le masque de leur ancienne dignité: Il n'a pas esté loisible d'y rien proposer sans le consentement des Autheurs des desordres, pour lesquels reformer, ils auoient esté assemblez, ny mesme à moy d'y auoir l'entrée & seance qui est deuë à ma qualité, ce que i'ay voulu faire fortifier les volontez de quelques gens de bien, non souilleez de corruption, & dans le cœur desquels estoit encores quelques vieilles estincelles de la vertu de nos ancestres, & aussi pour exposer mes actions passées & presentes à la censure des Estats, & reueiller leur fidelité, & leur deuoir à faire toute diligence de mettre en euidence les causes, & les Autheurs de tant de miseres, en proposer au Roy les remedes, & le supplier de faire punir ceux qui en seront coupables: mais ces desloyaux Conseillers emploierent encores le nom de sa Majesté, & furent si audacieux de luy faire dire qu'il me defendoir d'aller aux Estats, ayans par la monopole de leurs partizans, & pensionnaires, fait resoudre par l'assemblée que si ie m'y fusse présenté ie n'y eusse esté receu avec l'honneur deu à mon rang & qualité.

Et encores que ie me sois abstenu de l'entrée des Estats, & qu'on ne me peut attribuer pour faute que ma trop ardente affection au seruice du Roy, & au bien de son Estat, on ne laissa neantmoins de tenir des Conseils secrets composez de trois ou quatre personnes de peu de valeur, où fut deliberé, de se saisir de ma personne, & de celle d'autres Princes, Officiers de la Couronne, & Seigneurs qui ne pouuoient non plus que moy voir la Majesté de leur Roy si misera-

blement foulée aux pieds, ny supporter vne si honteuse profanation, & pource que le peuple n'eust peu estre persuadé que telles violences eussent esté commandées par sa Majesté. Il fut aussi conclu dans les mesmes Conseils de desarmer les Parisiens, changer les Capitaines des quartiers, & d'oster les chaines des ruës pour diminuer la force du peuple, & d'y mettre des Suisses, & autres gens de guerre, l'audace de tels Conseillers estant montée si haut qu'ils croyoient toutes choses faciles pour l'execution de leurs malheureux desseins.

Ces Estats doncques n'ayant apporté aucun fruit, sinon des pensions & coadiutoreries à plusieurs Deputez, de conscience venale, & au pauvre peuple, renouvellement de miseres. La Cour de Parlement de Paris qui en diuers temps a rendu tant de tesmoignages de sa fidelité à la conseruation de cette Couronne, & qui veille continuellement pour le seruice du Roy, auroit par Arrest du 26. Mars dernier arresté sous le bon plaisir du Roy, que les Princes, Ducs, Pairs, & autres Officiers de la Couronne, qui ont seance, & voix deliberatiue en la Cour, seroient inuitez de s'y trouuer pour aduiser sur les propositions qui seroient faites pour le seruice du Roy, soulagement de ses sujets, & bien de son Estat: mais tout ainsi que ceux qui veulent posseder contre droit & Iustice, vne puissance absolue qui ne leur appartient, estiment, & croient comme il est vray, qu'ils ne la peuuent retenir que dans le desordre & confusion: ces mauuais Conseillers voyans que la reformation de l'Estat estoit leur ruine ineuitable firent tant par leurs

artifices, qu'ils persuaderent à leurs Majestez que le Parlement auoit entrepris sur leur autorité, de sorte que les iustes intentions de ceste compagnie leur estans suspectes, & eux aduertis de ces mauuais rapports dresserent leurs Remonstrances en termes humbles, & respectueux qu'ils presenterent en Corps, & en toute humilité & reuerence à leurs Majestez, par la lecture desquelles leur furent représentées les miseres presentes de cet Estat, & les moyens d'y remedier par le chastiment des Autheurs, qui sans les nommer estoient assez intelligiblement designez. Cela faisoit esperer aux bons François de voir bien tost vne bonne Reformation, & des exemples de Iustice en la punition des coupables, mais ces mauuais Conseillers causes de telles Remonstrances, au lieu de se iustifier ou se contenir dans la modestie tousiours bien seante aux accusez, abusans de la bonté de leurs Majestez, & se seruans de leurs autoritez, & puissance, ont entrepris vne action la plus déreglée & profane à l'endroit de la Iustice, qui se puisse imaginer, eux coupables, accusez par la clameur publique, & notoirement conuaincus des cas mentionnez aux Remonstrances, qui est de faire vn Arrest qu'ils disent estre donné par le Roy en son Conseil, dans lequel ils declarent le Parlement incompetent, de reputer à sa Majesté les desordres que tous les iours se multiplient en son estat, prononcent calomnieuses ses Remonstrances, les appelans entreprises sur son autorité, & ordonnent, que pour en estaindre la memoire elles seront rayées & ostées des Registres de la Cour, & le Greffier tenu de les rapporter à sa

Maiesté à peine de priuation de sa charge, en quoy ils font assez cognoistre qu'ils n'ont autre but que d'estouffer la verité pour euitier la punition de leurs malefices: chose estrange, qu'il ne soit loisible à ceux qui souffrent de se plaindre & chercher le remede pour leur soulagement, cela ne se peut autrement appeler qu'une violence à la nature, qui dès la naissance inspire à tous les animaux le desir de se conseruer,

Ces malheureux qui se disent le Conseil du Roy reçoient iournellement sous le nom de sa Majesté toutes sortes de propositions qui vont à la foule du peuple: & n'y a rien si commun que les Arrests qu'ils donnent pour le droit d'aduis à ceux qui sont Autheurs de telles inuentions condamnées par les Ordonnances de nos Roys, qui veulent que telles personnes soient chastiées comme oppresseurs du public, & si le Parlement en a voulu faire quelques Remonstrances, ces mesmes Conseillers abusans indignement de l'autorité de sa Majesté en la foiblesse de son aage luy a fait reietter avec paroles aigres ce qui parloit d'une si venerable compagnie. Mais il ne faut trouuer estrange si ceux qui ont violé toutes les loix & renuersé tout ordre de Iustice, s'efforcent d'abbattre l'autorité de ce grand Senat, estant ce qui leur est le plus contraire, & qui fait plus trembler leurs consciences vlcérées de leurs meschancetez, & contre lequel ils croyent auoir quelque iour besoin d'alleguer incompetence à quoy ils se preparent, ayant desia tiré quelques pieces des Registres du Grand-Conseil, pour tascher à l'esleuer par dessus toute autre Iustice, & le rendre seul Iuge de routes leurs actions,

mais ils se trompent : Car si l'aage du Roy ne luy permet de recognoistre les dangers qui enuironnent son Estat , & que tout accez vers sa Majesté ne soit permis à ceux qui l'en peuuent aduertir. Ou peut-on auoir recours qu'au Parlement où assistent les Princes, Ducs, Pairs & autres grands Seigneurs de ce Royaume : & si les plaintes sont iustes, d'où pourroit sortir le remede que d'une si grande & celebre Compagnie , si elles sont faulses ou est-ce que les accusez pourroient trouuer vne plus glorieuse iustification , mais telles espreuues dignes des plus asseurées & nettes consciences ne peuuent estre que tres-espouuentables à ceux qui interieurement tourmentez du ressentiment de leurs crimes , ont desia mille bourreaux en leurs ames, & vne iuste apprehension des supplices qu'ils ont meritez.

C'est ce qui leur a fait casser ce tant necessaire Arrest du Parlement , pour tascher à supprimer de si sainctes Remonstrances , à fin que le temps & leurs artifices en fassent perir les preuues , & que le Roy venu avec les ans à la vraye cognoissance des maux qui affligent son Estat ne puisse faire faire Iustice d'une si malheureuse & desloyale administration : C'est à ce mesme dessein qu'ils font precipiter le Mariage du Roy , & en pressent l'accomplissement pour s'acquerir les bonnes graces de la Roynie future, à fin que sa faueur & protection leur soit vne Azille de toute seureté contre la haine vniuerselle du peuple, & malediction de toute la France.

Qui pourroit souffrir plus long temps de tels Conseillers qui ne sont que quatre ou cinq venus de rien , lesquels vsurpent toute la puissance

du Royaume, prenant insolemment l'autorité d'ordonner & changer toutes choses à leur volonté, renuerser les loix & tout ordre de Iustice, & se iouer licentieusement de la fortune de ce grand Empire.

Qui souffriroit voir le Roy exposé au mespris & à l'irreuerence, & toute sa Court aujourd'huy suiure ceux qui peuuent faire donner des Pensions, des Benefices, des charges & Gouvernemens, & ceux qui ont fait violence à la porte de son Louure, en sa propre Chambre, & en sa presence, il faut que ce soient des ames du tout viles, innobles, estrangeres & sans courage.

Voila Messieurs les desordres publics desquels iusques à present i'ay demandé la Reformation, & que plusieurs ont mieux aimé voir que preuoir, les sentir iusques au vif que les croire, ostant toute autorité à ceux qui les pouuoient par leurs preuoyances destourner auant qu'ils peussent paruenir à vn tel excès.

Outre tout ce que dessus, toute la France sçait le mespris qu'on a fait depuis les Alliances d'Espagne des autres Princes Estrangers, des voisins & anciens amis & allicz de cette Couronne, & le grand aduantage que l'Espagnol a en diuers lieux sur eux, par la conuience de tels infideles Conseillers, tescmoin la prise de la ville d'Aix, Vvfelle & autres places occupées & iniustement detenuës iusques à present, par le Marquis de Spinola, dans les pays de Cleues & de Iuilliers, où il eust fait de plus grand progres s'il n'en eust esté empesché par les Armes de Messieurs les Estats, à qui le public a cette obligation, & l'execution du Traicté ancien dont la memoire est presque perdue

duë pour auoir tant de fois esté rompuë & negligée, & maintenant du tout delaissee, fait assez connoistre que cela se fait pour fauoriser les desseins de l'Espagnol, & pour luy donner moyen d'affermir son vsurpation sur nos anciens amis & allies.

Chacun sçait aussi les procedures honteuses peu conuenables à la reputation de la France, dont on vse enuers le Duc de Sauoye, pour laisser opprimer & mettre ses Estats en proye à l'Espagnol, au notable preiudice de ceste Couronne: Cela ne leur peut que donner de iustes desfiances que l'on veut estayer l'Espagnol pour monter à l'Empire de toute l'Europe, & que l'on ne presse l'accomplissement du Mariage que pour ce dessein. Ils sçauent que cette alliance n'est pas seulement de personnes, mais aussi de Conseils: Ils voyent que le Roy va mesler ses affaires avec vn Prince qui est en sa pleine vigueur, luy va ouvrir l'entrée en toutes les parties de son Royaume, communiquer tous ses Conseils, & receuoir les siens pour le Gouuernement de son Estat; & n'ignorent point que la Royne son Espouse aura ses affections: ses fauoris, & ses desseins, & qu'elle aura bien le pouuoir d'introduire des Espagnols aux plus grandes charges, & aux Gouuernemens des places plus importantes; tout ainsi que depuis la mort du feu Roy nous y auons veu mettre des Italiens. Que si cette puissance s'establit vne fois, cet Estat prendra vne autre face par le changement qui s'y fera de toutes choses, Ils sont en allarmes pour eux & pour nous d'un si subit partement: & de voir encores en vn aage si tendre faire vn effort en la Nature, & hazarder

la santé de la personne du Roy par l'accomplissement qui se peut differer & remettre à vn autre temps. Cependant le Roy croistroit de plus en plus avec l'aage en force de corps & d'esprit, ses affaires pourroient estre en meilleur Estat, ses sujets plus contens, les voisins & alliez plus assurez, & toutes choses avec sa personne plus disposées au Mariage, Il ne dépendroit plus de l'ambition, de l'auarice, ny de toutes les peruerſes affections d'autres hommes; il seroit luy-mesme arbitre de ses volonteſ, tiendrait les reſnes de son Empire, n'appelleroit aux charges que les plus affectionnez à son seruice, aux Gouvernemens que les plus fideles, à son Conseil que les plus gens de bien, il seroit prudent pour oster le mal du milieu de son peuple; fort pour resister à ses ennemis, puissant pour assurer les anciens alliez de sa Couronne, florissant en paix, inuincible en guerre, & son Royaume comblé de benedictions celestes, & abondant en toutes sortes de felicittez, alors il pourroit accomplir son Mariage sans rien craindre, au lieu qu'à present au bruit de son partement toute la France est en larmes, toute l'Europe en allarmes, les voisins en desſiance, tout le monde en estonnement. Ceux de la Religion pretenduë reformée qui ne desirent que le repos sous le benefice des Edicts: disent tout haut que l'on aduance le Mariage à fin de les exterminer durant le bas aage du Roy, & auparavant qu'ils puissent cognoistre qu'ils sont membres vriles à son Estat, & que ceux qui desirent leur ruine disposent entierement de sa puissance & de son autorité; Que desia on a chanté des Triomphes en Espagne, qu'un Iesuite l'a

presché depuis peu de iours dans Paris où on voit mesmes des Liures faicts en Espagne, & en langage Espagnol, qui se le promettent attribuant tous les malheurs que la France a receus depuis cinquante ans, mesmes les detestables particides de nos Roys, à la liberté de conscience qu'ils ont donnée à leurs suiets, & particulièrement ceux qui ont pris Geneue & Sedan en leur protection; A cela ils adioultent le refus que la Noblesse a fait aux Estats de demander la conservation des Edicts de Pacification, quoy qu'ils doivent estre tenus & obseruez comme loy fondamentale de l'Estat, & la reception & obseruation du Concile de Trente, iurée si solennellement depuis peu de iours par le Clergé, assemblée à Paris à la face du Roy & de son Conseil, au grand mespris de son autorité, & de l'honneur de la Couronne de France. Chose inouïe auparavant, & qui n'a iamais esté practiqué en France, ny ailleurs: Ils sçauent le soin que l'on prend plus que iamais, d'entretenir la diuision parmy eux, & que pour les affoiblir, on tasche de corrompre quelque particuliere d'entr'eux, par offres & charges de dons & pensions, ils voyent qu'en diuers endroits du Royaume on enfreint les Edicts sans qu'ils puissent auoir de iustice, & qu'en mesme temps sans necessité il se faiet de grands preparatifs & leuées de gens de Guerre. Cela leur donne des iustes craintes & desfiances, que sous ombre des Mariages d'Espagne on ne vueille rompre les Edicts, & les reietter aux malheurs, dont par le passé on a faiet de trop miserables espreuues.

Toutes ces choses m'obligent de supplier tres-

humblement le Roy de pourvoir avant son parlement à la Reformation de ses Conſeils, & aux abus & deſordres de ſon Eſtat, dont i'ay nommé les principaux Autheurs à ſa Majeſté, qui ſont le Mareſchal d'Ancre, le Chancelier, le Commandeur de Sillery, Bullion & Dollé, leſquels par leurs violens Conſeils, & par leur intelligence ſecrete dedans & dehors le Royaume, rempliſſent toute la France, ſes voiſins & allies de ſoupçons & meſſiances.

Il y a encores d'autres perſonnes ſuſpectes à l'Eſtat, leſquelles pour des raiſons que i'ayme mieux taire que publier, ie ne nomme point à preſent: Cependant pour preuenir la calomnie, & informer tout le monde de l'integrité de mes actions: i'ay eſtimé eſtre de mon deuoir d'en eſclaircir tous Roys, Princes, Eſtats, & nations de la Chreſtienté, & des iuſtes & neceſſaires cauſes qui m'ont fait retirer de la Court.

Ie diſ d'ôcques que depuis la majorité du Roy, & la conuocation des Eſtats generaux, i'ay toujours eſté pres de ſa Majeſté pour luy reſmoigner la tres humble obeïſſance que ie luy dois, & puis dire que i'y ay eſté receu de leurs Majeſtez pendant mon ſilence, avec toutes ſortes d'honneurs, & bien-veillances, & au contraire, mal traité quand i'ay voulu me plaindre des miſeres & calamitez publiques: ce que i'ay enduré pendant huit mois que i'ay demeuré à Paris, quelque meſcontentement que l'on m'ait peu donner, encores que i'aye eſté aſſez ſouuent excité par la clameur publique à parler & demander la reformation que ie demâde aujourd'huy, mais voyant que l'authorité Royale eſtoit toute entiere és

mains de ceux qui en abusent, pour establir la
 leur, & que ma trop longue patience tournoit en
 ruine & dommage à ce Royaume, que mon re-
 spect ne seruoit qu'à les aigrir, & rendre plus au-
 dacieux à entreprendre sur ma personne, & sur
 ma liberté, lors mesmes que ie tesmoignoys au
 Roy & à la Roynne l'entiere confiance que ie pre-
 nois de leurs Majestez par la remise que ie fis en-
 tre les mains du Roy à la face des Estats de la vil-
 le & chasteau d'Amboise, qui m'auoient esté bail-
 lez par le traicté de S. Menehoult, faisant voir à la
 France que ie ne voulois autres seuretez que cel-
 les qui dépendent de mon innocence, & de la bon-
 ne grace de leurs Majestez & bien-veillance des
 gens de bien, & que outre tous ces deuoirs ils ne
 laisseroient par leurs artifices de me rendre
 odieux au Roy pour m'esloigner de ses bonnes
 graces, & de sa presence, iusques à se seruir de
 son autorité pour me faire defendre par le
 Sieur de Saint Geraud l'entrée au Parlement,
 aux occurrences qui se presentoient pour son ser-
 uice, luy faisant donner le commandement de
 m'arrester si i'y voulois aller, ayans plusieurs fois
 donné conseil de me mettre à la Bastille avec les
 autres Princes & principaux Officiers de la Cou-
 ronne qui se sont ioincts avec moy pour deman-
 der la necessaire Reformation des desordres,
 vaincu de ma propre patience, & de ce que non-
 obstant toutes mes submissions on se resoluoit
 de faire le voyage de Guyenne pour le Mariage
 du Roy, & de Madame, sans y pouruoir en sorte
 quelconque, & que à tous momens i'estois ex-
 posé à infinis dangers, & craignans par la perte
 de ma vie faillir en cet endroit au public, ie me

resolu de me retirer en mes Maisons, où ayant
 demeuré quelque temps on me fit ouuerture
 d'une Conference à Creil où Monsieur de Ville-
 roy me fut enuoyé, avec charge seulement de
 me conuier à retourner à la Court, ie m'en excu-
 sé, sur les iustes occasions que i'ay deduittes, n'y
 pouuant retourner avec la dignité & seureté
 qu'il appartient à vn Prince de ma qualité, ius-
 ques à ce qu'il eust pleu à sa Majesté establir vn
 Ordre en ses Conseils, & pouruoir aux desordres
 de son Royaume, reputez par les Remonstran-
 ces du Parlement, surquoy il pleust à sa Majesté
 me renuoyer ledit Sieur de Villeroy à Clermont,
 avec pouuoir plus ample, nous commençâmes
 la Conference par la Reformation des Conseils,
 & par l'ordre que sa Majesté y vouloit estre te-
 nu, lequel le Sieur de Villeroy me fit voir, que ie
 trouuay fort raisonnable: Mais touchant ce qui
 estoit des plaintes publiques contenuës aux Re-
 monstrances, ie reseruë à dire mes intentions ius-
 ques à ce que i'en eusse conferé & pris l'aduis des
 autres Princes Officiers de la Couronne & Sei-
 gneurs ioints avec moy, lesquels pour ce faire ie
 conuié par lettres de se trouuer à Coucy le vingt-
 septiesme Iuillet, ce que le Roy trouua bon, au-
 thorisant cette assemblée par la presence du
 Sieur de Villeroy qu'il y enuoya; Nous conféra-
 mes fort auant sur ce sujet, & en telle sorte que
 nous esperions tous tirer quelque fruiet de ceste
 Conference, au contentement du Roy & du pu-
 blic, ce qui certes eust esté, si nous n'eussions esté
 interrompus par le Sieur de Pont-Chartrain Se-
 cretaire d'Estat, lequel fut enuoyé expres de la
 part du Roy, pour me faire entendre la resolu-

tion que sa Majesté auoit prise de partir le premier iour d'Aoust pour faire son voyage de Guyenne, pour l'accomplissement de son Mariage, & qu'elle me conuioit de luy accompagner, ou bien dire en la presence dudit Sieur de Pont-Chartrain si mon intention estoit d'y apporter refus: De sorte que ie cogneus par ce Discours que les mauuais Conseillers aduertis de mes bonnes intentions, se seruoient de l'autorité du Roy pour rompre nostre Conference, & que malgré moy & pour mon deuoir, il falloit que ie fisse vne prompte Responce à sa Majesté par ledit Sieur de Pont-Chartrain.

Ie la supplie doncques tres-humblement de m'excuser si ie ne la pouuois accompagner en vn voyage si precipité iusques à ce qu'il luy eust pleu donner ordre à la reformation de ses Conseils, & au desordre de son Estat: Et faut faire iustice de ceux qui en sont les Autheurs: comme aussi du soldat Italien de la Citadelle d'Amiens, qui a assassiné le Sieur de Prouille, ignorant toutesfois que sous ombre de cette Conference on auoit dessein de me surprendre dans Clermont, ce que l'on eust fait si i'y eusse seiourné plus long temps: car pour exempter cette malheureuse trahison, le Marechal d'Ancre & ses supposts auoient fait aduancer quelques compagnies d'hommes d'armes, & de cheuaux legers es enuiron de la ville, rien ne leur manquant, que l'occasion qu'ils ne sceurent prendre. Voila doncques le seul sujet de la Conference rompu, qui n'auoit esté recherché pour restablir les desordres.

Puis doncques que le malheur de la France est

tel, qu'on reiette tous moyens necessaires pour euitier le naufrage qui le menace par la mauuaise conduite des desloyaux Conseillers, & que non-obstant mes tres-humbles remonstrances, celles du Parlement de Paris, & les clameurs du pauvre peuple gemissant sous le faix de leur tyrannie, on a pouffé le mal iusques au supresme degré de desordre: de sorte que la douceur des remedes le va irritant. Je suis contraint ietter la derniere Annee sacrée de mon deuoir, & faire paroistre non seulement à la France, mais à toute l'Europe comme il n'a tenu à moy, ny aux autres Princes, Officiers de la Couronne, Seigneurs, & Gentils-hommes vnis avec moy, que en la foiblesse de l'age de mon Roy, ce n'agueres florissant Royaume ne soit tousiours resté l'Arbitre General de toute la Chrestienté, & la terreur de ses ennemis au lieu qu'à present nous le voyons en danger d'estre le theatre où les Espagnols nos ennemis naturels, se preparent pour y faire iouer de tres-sanglantes tragedies.

Pour ces causes, nous Henry de Bourbon. premier Prince du Sang, & premier Pair de France, assisté de plusieurs autres Princes, Ducs, Pairs, Officiers de la Couronne, Gouverneurs de Prouinces, Seigneurs, Cheualiers, Gentils-hommes, Prouinces, villes & communautéz tant d'une que d'autre Religion, faisans la meilleure & plus entiere partie de ce Royaume associez ensemble pour sa conseruation, **DECLARONS** & protestons deuant Dieu & les hommes, que nous ne consentons & participons aucunement aux pernicieux Conseils dont on vse pour le Gouvernement & administration de cet Estat: Que nous

nous detestons toutes factions, Entreprises,
 & Intelligence contre l'autorité de nostre
 Roy: Que nostre but est, & n'a oncques esté au-
 tre, que de se rendre à sa Majesté la tres-hum-
 ble obeissance que nous luy deuons, & à la
 Royne sa mere? Mais voyans que l'on preuient
 leurs esprits de fausses persuasions, qu'on abuse
 du nom, & de la ieunesse du Roy, & de la bonté
 & trop grande facilité de la Royne, dont les vo-
 lontez ne sont libres, & que leurs Majestéz par
 la iuste crainte des forces de ceux qui les enui-
 ronnent, sans promettre aucun accez, sinon à
 ceux de leur faction, sont contrains d'autoriser
 leurs passions? Que l'on machine la ruine des
 bons François, qui souspirent comme nous
 apres la reformation de l'Estat, nous nous sen-
 tons obligez de nous opposer à ces violences, &
 d'exposer tout ce que Dieu nous a donné au
 monde, mesmes nos propres vies: pour faire re-
 cognoistre le Roy tel qu'il est, le tirer de l'oppres-
 sion, & des perils qui le menacent? Faire entrete-
 nir les Edicts de pacification, procurer le soulage-
 ment du peuple, faire regner la Iustice, defendre
 les bons, & les garentir de toute violence, faire
 punir les meschans & coupables, & restablie
 toutes choses en leur splendeur & dignité, par
 vne vtile reformation, & par le chastiment de
 ceux qui sont autheurs des desordres, ausquels
 il faut imputer tous les accidens qui pourront
 arriuer de nostre iuste defense, puis qu'au lieu
 d'arrester le mal, ils le font precipitamment nai-
 stre par le Conseil qu'ils ont donné de rompre
 la Conference, & de refuser tous moyens iustes
 & raisonnables, à fin de porter le Roy à vne

guerre non necessaire, & par consequent iniuste, pour aux despens de sa Maiesté, & du sang de ses bons & fideles sujets donner lieu à leur vindictiues passions.

Declarons que les armes que nous sommes contrains de prendre ne sont que pour le Roy, & pour conseruer sa personne, sa liberté, sa Couronne, & les loix fondamentales de son Royaume, lesquelles nous poserons quand sa Maiesté plus libre, & mieux conseillée, aura pourueu à ce qui est cy dessus représenté, & à ce qui est plus particulièrement déclaré par les Remonstrances de sa Cour de Parlement, & par les Cayers des Estats? Et iusques à ce qu'elle y ait par sa prudence & bonté apporté les remedes, nous la supplions encores tres-humblement pour donner contentement à ses sujets de differer son parlement, attendu le notable preiudice que sa Majesté en pourroit receuoir par l'alteration des cœurs & affections de ses peuples, pour n'auoir recueilly le fruct qu'ils esperoient, & qu'on leur a tant de fois promis, de l'assemblée des Estats.

Et d'autant que les Mariages des Roys ne sont affaires particulieres & domestiques, leurs Royaumes & Estats y ayans vn tres-grand interest, comme chose qui peut entretenir ou rompre la tranquillité publique; NOUS SUPPLIONS tres-humblement sa Majesté d'y vouloir faire garder les formes ordinaires, & chercher en affaires de telle consequence, les seurerez necessaires pour guarantir à l'aduenir son Estat contre les entreprises qui se pourroient faire en la faueur de ce Mariage, & pour ce, faire verifier & enregistrer le Contract au Parlement, Ainsi que

par les clauses qui y sont, sa Majesté y est expressément obligée, conformément à ce qui a esté de tout temps practiqué, & par mesme moyen vne Declaration conforme aux anciennes loix & ordonnances de ce Royaume, que nuls Espagnols ou autres Estrangers ne seront admis en aucunes charges, Gouuernemens, Offices, Benefices, Capitaineries, ny autres fonctions publiques dedans le Royaume, ny offices domestiques dans la Maison de la Roynes future, ainsi qu'il a tousiours esté practiqué en tous Estats; notamment en Angleterre lors du Mariage de la Roynes Marie avec Philippe Prince d'Espagne, ou pareille Declaration pour pareille cause, & pour eiter pareils inconueniens fut verifiée au Parlement du pays.

Et pour leuer les soupçons & iustes desiances que telle alliance precipitée donne à tous les amis & alliez de la France. Nous supplions aussi très-humblement sa Majesté d'entretenir & confirmer de nouueau les anciennes confederations que le feu Roy, d'heureuse memoire, a renouvelées avec tant de soing & prudence avec les Princes, Potentas, & Republiques estrange-res, comme vn des plus certains moyens à la feuereté de son Estat, & au repos de la Chrestienté.

Que si nonobstant si legitimes, raisonnables & necessaires conditions, on faict aduancer les forces du Roy contre nous, ou aucuns de ceux qui nous sont associez, on ne doit trouuer mauuais si nous nous opposons à cette violence par vne iuste & legitime defense, la nature & la necessité permettant à tous hommes de defendre leurs vies & de repousser la force par la force, ne nous

festans plus pour euitier le mal sinon de recourir aux remedes extrêmes; que neantmoins on doit trouuer iustes, puis qu'ils sont necessaires, bien que les ayons fuyz à nostre possible, ce que voudrions pouuoir encores faire à present: Ce que ferions si nous n'estions reduits à cette extremité, ou de voir la Maison de France exterminée, ou de nous mettre sur vne legitime defense pour la conseruer.

Prions & exhortons tous les Princes, Pairs de France, Officiers de la Couronne, Seigneurs, Cheualiers, Gouverneurs, Gentils-hommes & autres de quelque qualité & condition qui soient: Tous les Parlemens, tous les Ordres & Estats de ce Royaume, toutes les villes & Communautez, & generalement tous ceux qui se disent encores François, & qui ne sont encores ioints à nous de nous secourir & assister en vne occasion si iuste: **REQUERONS** & adiurons tous les Princes & Estats Estrangers; Tous les anciens alliez & confederez de cet Estat, de nous y prester ayde & assistance, & ne permettre que de si bons & loyaux suiets & Princes du sang, & autres Princes & principaux Officiers de la Couronne soient opprimez par vne telle coniuration, pour la consequence qu'elle apporteroit à tous les Estats de la Chrestienté.

Fait à Coucy le 9. Aoust mil six cens quinze.

Signé, **HENRY DE BOURBON.**















